

欽  
定  
全  
唐  
文

欽定全唐文卷九百二十八目錄

楊智遠

梅仙事實

盧道元

太上肘後玉經方序

孫智清

請重賜勅禁止樵蘇狀

軒轅集

太霞玉書序

吳子來

寫真自讚

薛幽棲

太上洞元靈寶無量度人上品妙經敘

李沖昭

南嶽小錄序

張沖虛

上枯檜再生表

倪少通

玉清廣福觀碑銘

并序

太乙觀董真人殿碑銘

并序

王棲霞

靈寶院記

山元卿

新宮銘

欽定全唐文卷九百二十八

楊智遠

智遠仙壇觀道士

梅仙事實

昔梅仙君河南壽春府人名福字子真乃西漢成帝時受命洪州南昌縣尉居官清節志厭浮華每以恤民爲念未嘗加鞭朴於民時值王莽作亂僭竊神器王鳳專政浸盛災異數見羣下莫敢言福不忍天下生靈坐於塗炭乃奮忠義之氣上災異書以陳治亂書曰臣聞箕子佯狂於商

而爲周陳洪範叔孫通遁秦歸漢制作儀品夫叔孫先非  
不忠也箕子非疏其家也而畔其親也不可與言也昔高  
祖納善如不及從諫若轉圜聽言不求其能舉功不考其  
素陳平起於亡命而爲謀主韓信拔於行陳而建上將故  
天下之士雲合歸漢爭進奇異知者竭其策愚者盡其慮  
勇士極其節怯夫勉其死合天下之知并天下之威是以  
舉秦如鴻毛取楚如拾遺此高祖所以無敵於天下也孝  
文皇帝起於代谷非有周召之師伊呂之佐也循高祖之  
法加以恭儉當此之時天下幾乎繇是言之循高祖之法

則治不循則亂何者秦爲無道削仲尼之跡滅周公之軌  
壞井田除五等禮廢樂崩王道不通故欲行王道者莫能  
致其功也武帝好忠諫說至言出爵不待廉茂慶賜不須  
顯功是以天下布衣各厲志竭精以赴闕庭自銜鬻者不  
可勝數漢家得賢於此爲盛使武帝聽用其計昇平可致  
於是積尸暴骨快心胡越故淮南王安緣間而起所以計  
慮不成而謀議泄者以衆賢聚於本朝故其大臣勢陵不  
敢和從也方今布衣迺窺國家之隙見間而起者蜀郡是  
也及山陽亡徒蘇令之羣蹈藉名都大郡求黨與索隨和

而無逃匿之意此皆輕量大臣亡所畏忌國家之權輕故  
匹夫欲與上爭衡也士者國之重器得士則重失士則輕  
詩云濟濟多士文王以寧廟堂之議非草茅所當言也臣  
誠恐身塗野草尸竝卒伍故數上書求見輒報罷臣聞齊  
桓之時有以九九見者桓公不逆欲以致大也今臣所言  
非特九九也陛下距臣者三矣此天下士所以不至也昔  
秦武王好力任鄙叩關自鬻繆公行伯由余歸德今欲致  
天下之士民有上書求見者輒使詣尚書問其所言言可  
采取者秩以升斗之祿賜以一束之帛若此則天下之士



發憤懣吐忠言嘉謀日聞於上天下條貫國家表裏爛然  
可觀矣夫以四海之廣士民之數能言之類至衆多也然  
其俊傑指陳世政言成文章質之先聖而不謬施之當世  
合時務若此者亦無幾人故爵祿束帛者天下之砥石高  
祖所以厲世磨鈍也孔子曰工欲善其事必先利其器至  
秦則不然張誹謗之網以爲漢毆除倒持太阿授楚以柄  
故誠能勿失其柄天下雖有不順莫敢觸其鋒此武帝所  
以辟地建功爲漢世宗也今不循伯者之道迺欲以三代  
選舉之法取當世之士猶察伯樂之圖求騏驎於市而不

可得亦已明矣故高祖棄陳平之過而獲其謀晉文召天  
王齊桓用其讎無益於時不顧逆順此所謂伯道者也一  
色成體謂之醇黑白雜合謂之駁欲以承平之法治暴秦  
之緒猶以鄉飲酒之禮理軍市也今陛下既不納天下之  
言又加戮焉夫戴鵲遭害則仁鳥爭逝愚者蒙戮則知士  
深退間者愚民上疏多觸不急之法或下廷尉而死者眾  
自陽朔以來天下以言爲諱朝廷尤甚羣臣皆順承上旨  
莫有執正何以明其然也取民之所上書陛下之所善試  
下之廷尉廷尉必曰非所宜言大不敬以此卜之一矣故

京兆尹王章資質忠直敢面引廷爭孝元皇帝擢之以厲  
直臣而矯曲朝及至陛下戮及妻子且惡惡止其身王章  
非有反畔之辜而殃及家折直士之節結諫臣之舌羣臣  
皆知其非然不敢爭天下以言爲戒最國家之大患也願  
陛下循高祖之軌杜亡秦之路數御十月之歌留意無逸  
之戒除不急之法下無諱之詔博覽兼聽謀及疏賤令深  
者不隱遠者不塞所謂辟四門明四目也且不急之法誹  
謗之微者也往者不可及來者猶可追方今君命犯而主  
威奪外戚之權日以益隆陛下不見其形願察其景建始

以來日蝕地震以率言之三倍春秋水災亡與比數陰盛陽微金鐵爲飛此何景也漢興以來社稷三危呂霍上官皆母后之家也親親之道全之爲右當與之賢師良傳教以忠孝之道今乃尊寵其位授以魁柄使之驕逆至於夷滅此失親親之大者也自霍光之賢不能爲子孫慮故權臣易世則危書曰無若火始庸庸勢陵於君權隆於主然後防之亦無及已又言國舅王曼事帝俱不納復上建三統書曰臣聞不在其位不謀其政政者職也位卑而言高者罪也越職觸罪危言世患雖伏鎖橫分臣之願也守職

不言沒齒身全死之日尸未腐而名滅雖有景公之位伏  
櫬千駟臣不貪也故願壹登文石之陛涉赤墀之塗當戶  
牖之法坐盡平生之愚慮無益於時有遺於世此臣寢所  
以不安食所以忘味也願陛下深省臣言臣聞存人所以  
自立也壅人所以自塞也善惡之報各如其事昔者秦滅  
二周夷六國隱士不顯逸民不舉絕三統滅天道是以身  
危子殺厥孫不嗣所謂壅人以自塞者也故武王克殷未  
下車存五帝之後封殷於宋紹夏於杞明著三統示不獨  
有也是以姬姓半天下遷廟之主流出於戶所謂存人以

自立者也今成湯不祀殷人無後陛下繼嗣久微殆爲此也春秋經曰宋殺其大夫穀梁傳言其不稱名姓以其在祖位尊之也此言孔子故殷後雖不正統封其子孫以爲殷後禮亦宜之何者諸侯奪宗聖庶奪嫡傳曰賢者子孫宜有土而況聖人又殷之後哉昔成王以諸侯禮葬周公而皇天動威雷風著災今仲尼之廟不出闕里孔氏子孫不免編戶以聖人而歆匹夫之祀非皇天之意也今陛下誠能據仲尼之素功以封其子孫則國家必獲其福又陛下之名與天無極何者追聖人素功封其子孫未有法也

後聖必以爲則不滅之名可不勉哉帝亦不報於是有歸  
休之志於戲所謂臣之於君再三諫而不從則逃之此豈  
虛言哉遂解衣挂冠東都門納官棄妻子去九江恐國舅  
攝之易姓名爲吳市門卒以保其身厥後求師慕道訪山  
採藥多隱名山廣谷之間嘗與張留侯子房執版唱無生  
曲以快其情也訪鴈蕩諸山卽會稽之南也遊南閩入支  
提山修鍊數年未就爲闕所觸憤然曰靈丹九轉愈久愈  
精何厭成功之晚遂入仙霞山卽武夷之東也徬徨乎無  
人之境逍遙乎塵埃之外猿啼古木虎嘯幽巖有竹曰瘦

腰有草曰黃芽靈苗異種雜然莫能盡識遂依巖結菴堅  
心苦志辟穀餐松慕學神仙積有年矣每望閩粵間有紫  
氣頗異復往建城立壇修鍊未幾一日山色溟濛煙霞滿  
室瑞氣浮空紫雲蓋覆於山頂天樂嘹唳有一神人語福  
曰空洞仙君至須臾仙樂近仙君臨福拜而迎之仙君曰  
念子學道志堅吾故下臨授汝外燒內鍊還返大丹之法  
九老仙都濟世之文汝可擇名山依法修鍊方得成仙言  
竟而梅君謝焉彩雲散空天樂自鳴仙君乃隱隱而去梅  
君精視天文數日下山行濟世之法無不靈驗初至雞籠



山修鍊被尸鬼相魔次至毛竹洞夜夢神人曰此山非先生修鍊之所遂入演仙山修鍊又爲野火所燒繼往玉華山修鍊昔神人居焉方欲修鍊而羣賊四起次至烏石山修鍊樵婦觸之梅君嘆曰道緣淺薄障魔羣起遂再行濟世之法數年至劍江西嶺修鍊一日祥雲瑞氣覆於山巔開戶視之乃道師空洞君降梅君拜而迎之告道師曰弟子恭依師旨廣行濟世之法遊歷名山修鍊多爲魔苦適至於此道師曰汝之道緣在飛鴻山也再授汝八神却魔靈丹乃召二光童子控赤駿白馬於山前君可急乘馬領

童至飛鴻山精修成功之日吾當舉汝使汝骨像同昇也  
言訖道師隱於雲中梅君遂乘馬領童至飛鴻山卓菴修  
鍊千日神遊體外丹光燭天而道成矣遂開爐出丹一丸  
祭天天神收之一丸祭地地神護之一丸自服服訖拜謝  
天地畢地神奏於三官三官奏聞天闕言西漢梅福成道  
於飛鴻山梅君乃乘白馬領童欲回九江二童馬前撫掌  
吟詩隱於山溪巨石之下須臾紅光射日紫霧漫空甘露  
天花一時飛降雲中仙樂嘹唳金童持節玉女執旛力士  
控鸞侍仙捧詔向梅君曰天闕詔下令汝乘鸞上昇梅君

拜謝天恩棄馬乘鸞昇天而去白馬墜於水中自後飛鴻  
山號曰梅仙山是也山之西有墜馬洲三十里有遺鞭山  
山之下有登仙里山之東溪有逃童石驂馬渡山之側有  
甘露源山之後有天花嶺石上有花跡自後鄉人號曰癩  
石嶺是也至今丹光隱伏猶存山根有梅君道院崇奉香  
火自後浮屠占之爲居址棄仙像塑佛像改名觀音院將  
梅仙像移入開山堂安奉郡之民相傳只呼梅仙院不從  
其額其院中有護法五聖公顯靈立廟院側人只呼作梅  
君廟梅君同其名乃仙聖跡也自漢至今歷二十二丙寅

金史卷之二十一  
卷之二十一  
矣自元始中至今貞元二年丙申計一千二百五十九年  
不泯矣時依建寧府梅仙堂傳本彼有梅山鍊丹之所故  
云爾

盧道元

道元貞元時人學道於寒棲子

上肘後玉經方序

昔巢居子奉事東海青童君以節苦心寂奉師禮具暑雨  
祁寒無懈無怠僅二十年乃口授元法手錄聖方曰若求  
跨鶴昇九霄未易致也若優游乾坤之內守顥然之氣容

色不改心目清朗壽數百年不歸可得矣然神仙祕術不可傳失其人長安年中巢居子以寒棲子賢人也使沐浴齋戒乃授其事至貞元八年寒棲子以余不揆陋微游放自適所從來者匪世俗之士無聲利之交若天與之正性謂不虛授乃傳之余以隱棲子文華之士昔登上科忽遺馳驚息心道門僅六七年其元法祕術無不得之而至理之要曾似未遇顧余有此遺禮留愛久之而言余知其志士也心忘爵祿遯時稱騷雅之什有而若無實而若虛者哉必當羽化雲飛豈止龜鶴齊壽寶厯乙未歲霞棲子盧

道元敬持太上八方綢繆元寶一軸以授隱棲施君敬之  
哉戒之哉

孫智清

智清太和時茅山三觀威儀道士

請重賜勅禁止樵蘇狀

伏以華陽洞天眾真靈宅先奉恩旨禁斷弋獵樵蘇秋冬  
放火四時祭祀咸絕牲牢自經艱難失去元勅百姓不遵  
舊命侵占轉深採伐山林妄稱久業伏請重賜禁斷準法  
護持差置所由切加檢察庶得真場嚴整宮觀獲安具元

禁疆界如前

軒轅集

集會昌時人武宗好神仙集以山人進宣宗卽位流嶺南  
居羅浮山大中十一年復徵至長安召問長生術尋歸羅  
浮

太霞玉書序

太上忘言其次立言流若卮言民斯蔽矣夫執形爲有累  
無往而可祛悟有爲無元隨在而可詣故天地以無名爲  
妙本大道以抱一爲真詮應萬彙而大象無形體混成而

神功不宰合符帝一超入太信之根孕元宗風宏自元始  
之炁逍遙齊物則曰大鵬天籟華蓋隱元則曰玉珮金璫  
得其意者象帝之先昧其真者墮身於劫獨力而不改周  
行而不殆者能幾人斯我皇唐大厯之初集棲朱明之埜  
忽石樓前洞晝然中開眎我靈文成茲玉書結空粲以成  
篇洞幽寥於無朕凡我兆景慎勿以執形求也釐爲十有  
二章統以太霞蓋究厥守中之道原諸法象之宗云爾高  
上三元能妙一而不窮靈芝八景本在身而非外則此之  
所云皆爲芻狗



吳子來

子來大中末道士嘗止成都雙流縣興唐觀

寫真自贊

不材吳子知命任真志尚元素心樂清貧涉厯羣山翛然  
一身學未明道形惟保神山水爲家形影爲鄰布裘草帶  
鹿冠紗巾餌松飲泉經蜀過秦大道杳冥吾師何人矚思  
下土思彼上賓曠然無已罔象惟親

寂爾孤遊翛然獨立飲木蘭之墜露衣鳥獸之落毛不求  
利於人間絕賣名於天下

薛幽棲

幽棲道士

太上洞元靈寶無量度人上品妙經敘

夫道者在於寂默虛無心冥神契經者資於書寫傳授誦詠宏暢非寂默則莫能契道非敷誦則無以宏經雖宗轍有殊而體貫齊一張之則異域混之則同歸因道所以立經因經所以明道道爲經之本體經卽道之跡用本跡相明體用元合是以煥真文於空洞之上開洪源於紫極之館則三品真目析羣方飛天之書七部衆經播雲篆光明

之跡於是元始天尊坐於元都玉京紫微上宮以三洞正經居前三大副經居後道德二篇爲輔弼玉清隱書爲教主且洞元靈寶則三洞中洞之一部無量度人則中洞一部之一卷修習之法則一部多門諷誦之篇則此卷爲首上消天災保鎮帝王下攘毒害以度兆民中拔祖宗已身得道斯則巍巍大範獨步三清者哉此經義旨冥奧音韻隱祕皆申明大梵之理非化誘常途之辭故云上聖已成真人通元究微能悉其章所以誦讀者多焉精達者鮮矣今不揆蠅蠓之力強舉千鈞之重直以凡下裁斷聖意儻

親奉元師必冀蒙詢誨故爲是敘

李冲昭

冲昭南嶽道士

南嶽小錄序

冲昭弱年悟道近歲依師泊臨嶽門頻訪靈跡唯求古來  
舊記希窮勝異之事莫之有者咸云兵火之後其文散失  
遂徧閱古碑及衡山圖經湘中記仍致詰於師資長者嶽  
下耆年或得一事旋貯篋笥今據所得上有五峯三澗古  
來宮觀藥院至於歷代得道飛昇之流靈異之端撮而直

書總成一卷目爲南嶽小錄庶道侶遊山得之披覽麤知靈跡之所自云時壬戌歲冬十月序

張沖虛

沖虛後唐同光時太清宮道士

上枯檜再生表

謹按瀨鄉記此樹枯來莫知年代自高祖神堯皇帝武德二年太上老君見於晉州羊角山語樵人吉善行云爲報唐天子吾是爾遠祖亳州曲仁里是吾降生之地有枯檜重榮唐祚永興高祖遂於羊角山置興唐觀其地改爲神

仙縣封羊角山爲龍角旣至亳州果有枯檜樹復生枝蓊鬱後因安祿山僭號之時萎悴及祿山殄滅元宗翠華歸奏枝葉復榮今年十月中又於其上再生一枝約長二尺聳身直上迴出凌虛葉密枝繁獨異眾木

倪少通

少通南嶽道士

玉清廣福觀碑銘

并序

玉清觀者法玉清聖境而名自吳及梁相續重興漢文帝之禊蘇真人耽自郴陽上昇眾仙迎往元辰曾遊斯地吳

大帝之代葛仙翁元在句容受道煉丹於湧泉亦經於此  
不獨寶錄具在仙籍左右靈蹤古今不泯赤松山畔曾聞  
叱石之羊王喬嶺前昔現飛鳧之履鄉鄰白鶴有傅翁得  
道之巖境接赤烏卽施君住宅之址社連金闕洞秀玉華  
草木長春煙雲迴秀黃精遍野白朮盈川闕監臨楊元德  
門人王太清心營半載箕斂萬縉山現良材地呈貞礎林  
麓聽丁丁之響庭除觀矻矻之功法天上之皇都布凡間  
之紫府闕銘曰

觀本無名古仙像成會朝金闕遂法玉清寶殿締構祥雲

送迎元功福蔭普壽函生玉清聖化棲隱名賢誘彼英信  
構茲良緣福流曠劫功逮幽元解釋羅酆神登九天棲神  
之鄉鄰有沖陽其道不宰載之無疆洞馨蘭菊林翥鸞凰  
表瑞旌祥福資聖唐仰觀洞府靈路稀有蕩滌妖氛資崇  
祿壽太清太虛建功不朽名載碑珉天長地久

太一觀董真人殿碑銘

并序

原夫自然生道道生太一太一生二儀二儀既立衍明三  
景三景列像以均四氣四氣氤氲潛配五行五行相屬而  
聲六律六律爰敘以旋七政七政將平而定八方八方布



設是爲九宮九宮各據周羅十極十極剖判而成萬彙萬  
彙旣終返乎太乙卽太乙孕靈之道變化還元妙用虛無  
之旨也混沌旣分張乾裹坤中有太乙虛無之尊騰闢二  
氣散爲真根清濁異體元牝通門道德之祖自然之孫卽  
太乙真精灌溉之理矣右月左日光輪星質大遊小遊分  
綱列職照運寰區定臨凶吉寒暑數遷災福靡失唯德可  
順唯道無窒卽太乙神處變遷之用矣動靜杳冥中含一  
精沖和純粹天清地寧統貫三才神靈谷盈春發夏養秋  
合冬成逐道開布萬化俱生卽太乙神氣覆育之道矣紫

清之上玉皇御中有太乙之府上台之宮宮有九署三官  
所宗太乙真人太伯仙翁定生丹籍落死北酆統制萬靈  
元化無窮卽太乙掌符錄權總之化也故陰陽不測之謂  
神神者太乙之祖氣也是以一大謂之天故經云象帝之  
先卽元元之首矣廬山真人殿者按仙傳卽太乙真人隱  
化之所治也連虎溪福地按詠真洞天上應仙曹下通陰  
府真人逐代降世魏末晉初孕靈於閩川侯官寓姓董氏  
名奉字君異託跡混時行仁布惠活士燮於交址救屈女  
於柴桑種杏拯民蘇苗降雨攝欺闕以威虎歸貞信以輕

金驗太乙丹符知非常道散無功穀帛遠非常名真人久  
處下方將朝上界以晉永嘉元年三月十五日感上帝錫  
命曰太乙真人歷居凡世功滿三千可任碧虛上監仍掌  
吳楚人民生死之文罪福之籍旌幢降處千條之蜺影盤  
空羽駕行時萬朶之仙花出洞竟望天門隱隱而上卽知  
聖人遁世俗眼何遼千載累功一朝現化暨乎風遺今古  
事有改遷道隱時訛民囂淳散巨唐天寶初制下重加葺  
修後值世更屢經兵火山口半里額挂卑祠少通幸憩名  
山訪茲聖境榛蕪隘道荆棘漫穹水石亂基狸鼠交穴目

欽定全唐文

卷九百二十八

仿少通

共

凌幽谷對百鳥傷嗟情斷孤雲聽流泉嗚咽默然憤志誓  
續真風與弟德規力勤三禊形忘疲倦手覺胼胝迺遇韓  
王節鎮江城仁霑野澤減有餘之俸助無罄之緣匠運斧  
斤基圓殿宇時感松凝甘露山吐靈光沼綻交蓮林抽合  
竹禎祥異事郡國咸驚卽今上皇帝膺嗣明堂丕圖寶位  
堯雲四布舜日廣昭仰紫氣於函關重光道德敬朱鬃於  
羊角繼肅乾坤文明丕彰無爲自化保大十一載遣北苑  
使董源支慶王帑藏錢物計三百萬大建仙宮造四殿五  
堂重門諸厦都一百三十間正宇塑五十九品真容莫不

山見良材巖呈異礎工勤商伯匠巧般輸神助縈勞元資  
夙智首尾四稔備用都周繇是梁竦虹軀簷飛鳳翅風搖  
金鐸巖洞響清日映朱欄松筠影翠麗移崑崙景象蓬瀛  
瀑注方池稱養琴高之鯉雲鋪疊砌宜昇索靖之鳧九水  
民歡五峯靈暢山燈夜照巖香曉歆文武星攢緇黃雲集  
寶臺齋建霞分紅杏之原紺殿晨開光射白蓮之頂鯨鯢  
鎖躍箕簏龍吟靈應九霄道傳萬古功標丹雀善記羅酆  
福利幽陰神超靜冶冀扶帝座長慶皇宮少通受業朱陵  
叩興真跡非邀名譽貴顯元猷愧無夙契之人直紀象先

之德用刊貞石永固仙壇誠懇誠歡勉爲銘曰

元黃未判大道爰昇太乙將兆萬化俱興爲而不恃得而  
不矜日用匪測混然常澄無象有象非真是真道旣設教  
德乃通神功動幽壤福慧生人聖恩不泯等劫長春皇化  
元化真功神功靈光出谷仙花散空殿雲香靄壇星燈紅  
天長地久算福無窮江嶺甌閩高仙混塵丹生冥腐杏拯  
孤貧遺風碧洞流香紫宸感乎聖德像化咸新湓水城南  
詠真天北晃晃真宮巍巍聖德道合昌時靈扶睿國自晉  
流唐元功靡測日月輪明人生萬徧山無改遷化有更變

杏擁仙壇香歆寶殿實謂瀛洲飛來嶽面山鎖平原亭臺  
秀麗甘露凝松祥雲繞砌天上何殊人間莫繼化獎元風  
百千萬歲唐保大十二年歲次乙卯十一月記

王棲霞

棲霞一名敬真字元隱七歲以神童及第天祐時避亂南  
渡爲道士徐知誥輔吳召至金陵館於元觀館昇元初加  
金印紫綬賜號元博大師又加號真素先生保大元年卒  
年六十二

靈寶院記

粵靈寶者空洞赤書之祕號也鬱勃自然生天地先運無  
爲德被有爲作是以太上立德其次立功德者乾坤之大  
生功者生三中利益也苟德以潤身功能濟物卽示輕舉  
如躡歸徑革喧囂於蛻脫耳且校籍所載真跡所存有非  
常人立非常功遂厯古今芳猷不絕茅東卿棣鄂以直道  
仕愷悌立身周物者智樂靜者仁去黨咸陽初依恒嶽尋  
棲此山介然掩躁克奉元寂陶然若樸惟德動天遽繡衣  
持九錫之文芝蓋導三清之路元鵠下盤感應無昧斯積  
業夙習之感哉緬維異代同途繼踵美蹟者諒我公矣公



以踐履德業游泳忠信松高韻遠玉真芒寒景鐘麟史臺  
構襲蹟鳳池龍節鴈序分寵致君一匡錫我所履威臨鐵  
甕貴擁朱輪智發未萌道了得一蒲鞭舉而過改桑附謠  
而政遐謂我無欲民撲我無爲民化法黃老而熙帝載考  
始制而宏象教乃顧名都更植世福靈寶院者梁天監歲  
貞白陶先生宏景所創也始本昭真其號焉紫陽觀卽長  
史宅界於東小茅嶺雷平山列於南鍾山西朝焉良常北  
衛焉其餘勝概羣阜若衆星之環拱不可殫論先是迴臺  
層漢攸閣匝雲祕三洞璫文集丹邱羽客門人周仙君子

良勤修於是崇習元風鍊金石身騰煙霞轍時移代夏瓦  
木之功寔泯及唐太和中太尉贊皇李公每瞻遺蹟屢構  
遐緣門師道士孫智清復討前址再建是院尋諸舊號額  
曰靈寶爾後既遇兵焰靈致煨燼荆棘相森凡材圖長狐  
兔往焉芻蕘往焉弗芟弗薙歷五十載矣棲霞冑叨素業  
幼專不息雖童丱獲名而屢厄兵難跡不遑處遺構殆空  
斷梗杳泊自北徂南幸托元化遐欽茲境聿諧所適乃勵  
畚鍤忘斃勞砌壇植松結茅庇拙紉蘭餌朮願言終遁俄  
奉先齊王旨命出居會府齒朝修事沐浴恩遇揚歷館仞

甄道銜表命服再瑄再簪是埏是鎔泊我公移鎮是邦自  
以風痺厥躬告從谷隱公遂捨俸錢一百萬俾於舊基別  
崇利有稟命之際亶亶勉勵夙夜匪懈思竭克勤冀荷恩  
教噫事難謀始智寡周防且虎視非一雀之圖而雀終噪  
蟾盈非片雲可同而雲或掩時哉理非契也非台曜覽幽  
幾止終廢繇是度揆經營月期日就博邀執斲量材取制  
墻茨必襄圖蔓必薙平瓦礫以等阜屏豺狼而斷羣力工  
約萬綿歲靡期剗劂督奇丹雘眴妙造正殿三間中塑靈  
寶天尊景從砌壇三級三門三間環繞廊廡一十六間并

葺壞整頽降眞堂續連於內重新治止再築垣墻東北隅  
卽忠義太保公之季弟先於舊閣基建瑞像殿三間兩厦  
中塑羊角山應現老君西南隅向曰三官堂三間塑像岌  
岌其狀亭亭其勢金碧其飾輪奐其映瓦疊駕翠甍差鳳  
翹睟容禮而若眄侍衛瞻而乍愕旌幢翻翻雲鶴駢駢對  
俾崛起異疑飛來非我公願力斯應象教斯感卽荒鹵之  
域安歛睹壯麗乎足使眞風永布靈致恒芬配天地而齊  
壽總山川而介福噩噩烈烈可久可大棲霞智慚絕妙才  
非述作蓋受恩於始受命於此謁誠竭慮迨茲成功聊實

記於質文呈台覽而刊於將來也時太和三年重光單闕  
歲九月乙酉朔九日癸巳謹記

山元卿

元卿紫陽真人

新宮銘

良常西麓源澤東泄新宮宏宏崇軒轅轅雕珉盤礎鏤檀  
竦窰碧瓦鱗差瑤階肪截閣凝瑞霧樓橫祥霓騶虞巡徼  
昌明捧闌珠樹規連玉泉矩洩靈飈遐集聖日俯晰太上  
游儲無極便闕百神守護諸真班列仙翁鵠立道師冰潔

玉成漿饌瓊爲糜屑桂旂不動蘭幄互設妙樂競奏流鈴  
間發天籟虛徐風簫冷徹鳳歌諧律鶴舞會節三變元雲  
九成絳雪易遷徒語童初詎說爲毀乾坤自有日月清寧  
二百三十一年四月十二日建

欽定全唐文卷九百二十九目錄

杜光庭一

紀道德賦

代陶福太保修瀝口化請額表

謝新殿修金籙道場表

謝恩除戶部侍郎兼加階爵表

謝恩奉宣每遇朝賀不隨二教獨引對表

謝獨引令宣付編入國史表

賀黃雲表

賀雅州進白鵲表

賀天貞軍進嘉禾表

請駕不巡幸軍前表

第二表

謝恩賜興聖觀宏一大師張潛修造表

謝恩宣賜衙殿點鐘表

謝恩賜玉局化老君表

賀收隴州表

壽春節進章真人像表



黃萬祐鄧百經賜紫衣師號謝恩表

詔與黃萬祐相見謝表

皇帝爲太子生日設齋表

欽定全唐文卷九百二十九

杜光庭

光庭字賓至縉雲人一日長安人咸通中應九經舉不第  
入天台山學道從僖宗幸興元留蜀事先主爲金紫光祿  
大夫諫議大夫封蔡國公賜號廣成先生遷戶部侍郎後  
主立授道籙於苑中以爲傳真天師崇真館大學士後解  
官隱青城山號東瀛子年八十五卒

紀道德賦

道德清虛元默生帝先爲聖則聽之不聞搏之不得至德

本無爲人中多自惑在洗心而息慮亦知白而守黑百姓  
日用而不知上士勤行而必克旣鼓鑄於乾坤品物信充  
物於東西南北三皇高拱兮任以自然五帝垂衣兮修之  
不忒以心體之者爲四海之主以身輓之者爲萬夫之特  
有皓齒青娥者爲伐命之斧蘊奇謀廣智者爲盜國之賊  
曾未若軒后順風兮清靜自化曾未若皋陶邁種兮溫恭  
允塞故可以越圓清方濁兮不始不終何止乎居九流五  
常兮理家理國豈不聞乎天地非道德也無以清寧豈不  
聞乎道德於天地也有踰繩墨語不云乎仲尼有言朝聞

道夕死可矣所以垂萬古歷百王不敢離之於頃刻懷古  
今云古今感事傷心驚得喪歎浮沈風驅寒暑川注光陰  
始銜朱顏麗俄悲白髮侵嗟四豪之不返痛七貴以難尋  
夸父興懷於落照田文起怨於鳴琴雁足淒涼兮傳恨緒  
鳳臺寂寞兮有遺音朔漠幽囚兮天長地久瀟湘隔別兮  
水濶煙深誰能絕聖韜賢餐芝餌朮誰能含光遜世鍊石  
燒金君不見屈大夫紉蘭而發諫君不見賈太傅忌鵬而  
愁吟君不見四皓避秦我我戀商嶺君不見二疏辭漢飄  
飄歸故林胡爲乎冒進貪名踐危途與傾轍胡爲乎怙權

恃寵顧華飾與雕簪吾所以思抗跡忘機用虛無爲師範  
吾所以思去奢滅慾保道德爲規箴不能勞神效蘇子張  
生今於時而縱辯不能勞神效楊朱墨翟今揮涕以沾襟

代陶福太保修瀋口化請額表

臣某言伏以瀋口化者卽二十四化之第十八也節應配  
於小滿列宿應於畢星陳安世白日昇天臺蹤尚在褒女  
仙乘車得道轍跡猶存每歲春秋准勅祈醮頃自用軍之  
後并已摧殘古殿空壇僅餘基地仙儀像貌盡翳榛蕪往  
來絕瞻敬之門士庶無依歸之所豈期福地一旦蕭條臣

輒備興修願資聖壽伏惟陛下軒帝靈源緱山仙緒繼天  
御極用道臨民萬方榮廣覆之慈三教被維新之澤芝田  
柰苑咸荷精嚴古廟儒宮亦蒙繕飾况是長生之教敢申  
崇葺之儀旋以翦薙蒿萊興營宇室像設免嗟於暴露簪  
冠克遂於焚修邈彼靈蹤還爲勝概香燈有託齋醮無虧  
兼召道士楊元敬獨孤知元和某等三人就觀居住訖但  
以荒涼旣久門額全無敢祈雨露之恩特飾神仙之境其  
化伏乞聖慈依瀋口舊名仍賜給聖壽額許臣自製造懸  
挂庶使琅書銀榜長懸日月之輝漢水仙山永祝聖明之

壽臣某無任之至

謝新殿修金籙道場表

臣某言伏奉聖旨與右街威儀何冲徽等二十一人於新殿內修金籙道場七晝夜今月十四日開至二十日散供奉官楊紹業依時設拜言功表贊訖者伏以天贊聖功鼎新大內瑤軒玉砌超三島之鰲宮青瑣丹扉逾九清之鳳闕叶皇居之壯麗觀帝宅之深嚴萬國仰瞻千靈森衛纔畢瓊宮之製先開金籙之壇鋪舒而一一精新祇敬而重重蠲潔龍香上達依稀而萬聖俱臨蟾月低光彷彿而千

眞入會延洪睿算遐永皇圖近臣拜手以投詞宰輔齋心  
而瞻祝殊禎允集巨貺無涯隆大寶於千春總八紘於一  
統臣叨膺科教獲備焚修豐玉饈於天廚躡雲庭於仙境  
兢榮已極頒錫薦臨伏蒙宣賜襯錢銀器疋段等澤深溟  
海恩重蒿衡顧慚鷦燕之微何報聖明之獎臣無任之至  
謝恩除戶部侍郎兼加階爵表

臣某言伏蒙恩勅除授光祿大夫尚書戶部侍郎上柱國  
蔡國公廣成先生者睿慈春煦宸翰雲敷叨榮而但覺逾  
涯荷渥而罔知所措臣某中謝臣聞聖明居上是必授任



才能俊乂在官乃貴陳力就列皆以道包經濟言達變通  
上有致君之能下盡爲臣之節處既得地用務適時苟虧  
利物之期必致取容之誚如臣幽懦榮奉休明循顧庸襟  
敢臻殊寵伏惟陛下披圖創厯握紀繼天明逾兩曜之懸  
德合二儀之普蕩滌氛垢蘇泰寰區功宣而萬有同心化  
被而八紘繞指夢通巖壑肱股符命說之求景仰煙波輔  
弼契非熊之兆元勲貞佐捧日扶天人傑時英誕星降嶽  
青宮翼贊日月重光朱邸忠貞盤維增永臣某江湖賤質  
簪褐微才爲儒旣昧於成麟學道甘期於畫虎矧復辭吳

歲久奉聖年深杳無山水之思每感風雲之會歸棲照育  
三十餘秋施重嵩衡遇深溟渤變枯荻爲茂草起敗骨爲  
豐肌徒曰奇功難偕聖獎是以臣俯盈丹懇積感皇慈曉  
動神魂夜驚形影效報未申於絲髮憂惶空溢於肺肝况  
復啟運之初垂裳之始錫峒山之美號加北省之華資無  
以身論國之譚上裨天聽乏造膝沃心之議仰副宸衷揣  
身世而榮顯居多於爵位而貪饕已極豈可重塵清級更  
履殊榮紹碧落之嘉稱集元關而瓊質且如漢推曷倩晉  
有稚川未聞聯居清重之司再踐非常之秩揣量戰越進

退兢榮仰對宸嚴無階陳讓唯虔砥礪久答鴻恩臣不任  
謝恩奉宣每遇朝賀不隨二教獨引對表

臣某言伏蒙聖慈以臣每有起居稱賀皆與道眾僧人齊  
班特降宣旨令臣自今以後獨入引對不隨眾列者禮加  
異等事越常倫褒稱發自於聖心榮盛獨光於道域隆恩  
顯示負戴難勝臣某誠榮誠懼頓首頓首伏惟陛下誕睿  
承天執符御極包乾坤而覆載懸日月以照臨披金鏡之  
光華無幽不察調玉燭而亭育有物皆春由是露灑天根  
澤流地表肅武功而定氛祲桀黠悛心修文德而服要荒

奸兇革面毳幕穹廬之俗冰居穴處之鄉重趺來庭占風  
入貢理定而樂作功成而禮行舉三代之類綱興百王之  
隆典有沿有革無黨無偏至若羣后朝元垂衣當宁儼三  
傑十臣之佐冠非熊審像之賢文物羽儀輝今映古其或  
雲衫羽服仰丹階而効嵩呼白足方袍列彤庭而申華祝  
此時微臣常依旅進得面雲階每驚巖壑之微獲在煙霄  
之上今則迥隆睿獎頓革前儀念臣雖迹預簪冠而身叨  
爵秩清級纔移於北省華資又接於南曹特令敷奏之時  
不雜緇黃之侶俾其獨引顯示優恩昔者魏重謙之梁尊

貞白漢稱曼倩秦有子平禮容靡覩於新規朝揖皆循於  
常度今者降九天之明命垂萬世之宏規退省幽辱但切  
凌兢之感顧慙纖弱何勝雨露之恩惟勵丹誠永酬鴻澤  
臣某無任之至

謝獨引令宣付編入國史表

臣某言伏蒙聖慈特降宣旨賜臣不隨二教獨引對敷以  
臣謝恩表宣付史館者迺自宸衷光申異禮仍編信史永  
戴優恩祇荷難任寵榮增極臣某中謝伏惟陛下大明御  
歷至聖宣功廓覆載以覃恩竝曦舒而流照賢良入輔庭

多命世之臣夷夏歸仁府積殊方之貢有俗皆臻於富壽  
無爲欲蹈於華胥由是蓬島芝宮咸加炳煥祇林柰苑畢  
集精嚴四靈挺質以呈休六氣調時而表貺元儒鼎盛緇  
褐同歡臣猥以常倫榮逢景運道籍兩塵於美號官榮再  
履於崇班別顯殊恩賜其獨對緇黃班裏受宣而徑入雲  
天鵲鷺庭中顧影而疑生羽翼今則寵編國史昭示寰區  
迴隆非次之遷永載不刊之典荒愚有素難勝雨露之恩  
蕭芥至微何報乾坤之德惟虔修勵上答聖明臣不任

賀黃雲表

臣某伏觀鴻臚卿趙溫珪奏今月二十三日皇帝駕幸得  
賢樓看閱將士皇太子自城南閱馬帳頭迴入城至酉時  
城上有黃雲兩片狀如華蓋逡巡變爲紫色者臣謹按堯  
之誕生常有黃雲垂覆舜之御宇常有黃雲凝空又漢宣  
帝幸甘泉宮紫雲入殿宋世祖踐祚紫雲見於端門黃帝  
有瑞雲以雲紀官今者德動天休瑞呈雲物華夷共仰海  
嶽同歡臣某中賀伏惟陛下體道握符惟天縱聖仁周動  
植惠溥寰瀛柔遠俗以文明懾兇奴以武畧蓋以中原未  
泰品物未寧將申戡靜之機用拯生靈之弊授律則南摧

醜蜚鑿門則北掃煙埃鐵軸牙檣水耀龍驤之旅霜戈雪  
戟陸陳隼擊之師振動山川奔驅雷電佇聞恢拓以廓乾  
坤爰命皇太子訓整六軍申明三令蒙輪挾輶之士壯氣  
凌空拔山扛鼎之夫雄心貫日皆堅金石咸勵忠貞允合  
天心果昭靈貺輪囷對起蕭索齊凝成金柯玉葉之奇高  
浮帝座變紫蓋如葩之狀低接皇城初呈蔭鼎之姿漸結  
臨關之色有以見圓穹贊祐皇德升聞越唐堯虞舜之徵  
超宋祖漢宣之感自此率賓八極同軌萬方增聖壽於億  
千固宏基於隆永臣躬深睿獎疊覩殊祥敢謠詠以抒情



誠効謳歌而頌聖德詩一首陳進

賀雅州進白鵲表

伏覩嚴道縣多功團崇善里百姓李彥韜於楠樹上獲白  
鵲進獻者五行表瑞見金運之隆昌百辟同瞻賀玉京之  
貽貺臣某中賀臣聞王者正名立訓體乎天意勝殘去殺  
慰此人心則有異木珍禽來儀朝闕霜毫動色紺趾標奇  
斂羽呈姿應見徒誇於漢魏傳聲送喜翱翔顯奉於皇明  
伏惟陛下瑞冠百王功超三古協序而風調禹律燭昏而  
鏡滿軒臺亭毒萬方再樹乾坤之本照臨下土重懸日月

之光鄙炎漢之息肩邁唐堯之鼓腹人歌歲稔物賴時康  
况乃萬旅貔貅千營鎧甲擒兇翦弊撫弱字孤雷掀鉦鼓  
之行雲黯旌旗之舉發令而雄豪踴躍申恩而疲瘵昭蘇  
五星運度以垂休八海承風而寢浪遂至山河効祉禽羽  
呈祥遠離海上之巢來對雲中之闕觀其玉籠乍啟雪姿  
不驚望聖苑以迴翔對天慈而鼓舞往來瑤陛棲泊珠簾  
認素羽以難分聽新聲而已熟不是成橋之侶殊非繞樹  
之羣旣彰團雪之容實煥來金之盛佇見干戈載止奸邪  
屏除蕩疆場之煙烽永歸壯極靜寰區之榛梗自我西方

金定全集卷之二十一  
信超魏德之雄更掩漢成之代臣獲逢昌運累覩殊祥輒  
陳歌頌之詞上浼聖明之鑒臣謹課頌聖德紀瑞詩一首  
陳進干瀆冕旒無任之至

賀天貞軍進嘉禾表

臣某伏覩天貞軍留後崔善進射洪縣百姓王友田上嘉  
禾合穗圖者聖德遐通祥符疊至文武瞻覩中外歡呼臣  
某謹按瑞圖云嘉禾者美瑞也稔歲精王者德至於土則  
二苗同秀昔者唐叔得禾異畝同穎成王問周公曰二禾  
一穗意天下和同乎王命唐叔作嘉禾篇由是九土會同

八紘歸化旅獒西貢越雉南來三十世之宏基七百年之  
大業輝前映古逾夏掩商今在聖明復彰斯瑞伏惟陛下  
紹軒皇之聖緒承周帝之洪源應歷數以配天總華夏而  
類帝惟恭惟儉絕嗜音酣酒之娛乃聖乃神有明目達聰  
之美宏武德而先懲不軌電掃奸妖播文風而旋撫戎羌  
雲奔琛賁憂勤黎獻軫憫耕農歲致豐穰田無炎潦德通  
於地見共秀於二苗應達乎天果異畝而同穎契聖祖興  
周之瑞表吾君拓土之徵昔則合天地爲一同今則包萬  
方爲一統況屬王師薄伐誓衆弔民雄稜已懾於彼方禎

異先呈於近境佇觀收剋永蕩氛霾開九天日月之光顯  
符周卜合四海生靈之望同比唐忝臣竊仰瑞圖賡歌聖  
德願預採詩之錄思陪唐叔之篇謹譟頌聖德嘉禾合穗  
詩一首進上

請駕不巡幸軍前表

臣某伏覩宣旨駕幸北路軍前者臣聞展義巡瑋禮經垂  
典誅兇伐叛有國通儀蓋欲迴廣照於一方輯五瑞於羣  
后翦其暴亂慰彼蒸黎况蠢爾邠岐久迷大順匪朝伊夕  
卽覩殄平不足以親駕戎車遠臨狡穴依依衆懇僉用驚

疑伏惟陛下逾舜文明超周神武稟秋霜之令敷春育之恩委以至公推其大信覆載之內風偃化行而隴渭之鄉岍岐之俗甘寒谷之氣自棄陽和息惡木之陰顯孤臨照恃蟻封而稱固巢燕幙以偷安今則上將專征雄師薄伐遠憑聖算必剗根茲竊惟漢曲褒川方當寒沍霜雪嶮棧豈易躋登况射鮒穿蠅詎用千鈞之弩孤城荒堞寧煩萬乘之威伏乞聖慈俯徇羣心特寢成命佇觀剋捷永統華夷千冒宸嚴無任戰越兢懼迫切屏營之至謹詣閣門奉表陳請以聞

第二表

臣某伏觀宣旨駕幸北路軍前皇太子宰臣百官等上表  
陳請未賜俞允者省訪風俗雖經典之舊儀慰撫師徒乃  
君父之慈照但以道途險阻水陸嚴凝遐邇羣心實切憂  
灼伏惟皇帝陛下體堯慈惠逾舜欽明欲令寰海之人共  
沐雍熙之化憬茲汧隴密邇封隅久負歡盟深辜恩信識  
變通者已束身効順迷向背者猶掩耳偷安致一境之生  
靈銜積年之怨抑徇吠堯而有日思慕舜以無由所以授  
姜鉞以整師築韓壇而誓衆風馳號令雨驟雄豪上將等

威震雷霆心堅鐵石指期剋日必就削平豈勞親駕翠輿  
躬麾白羽六龍八馬驅馳嶮巖之中萬騎千官迢遞層峯  
之外方零霜雪漸逼沍寒伏乞聖慈俯聆億兆之情特駐  
省方之命上爲宗社下慰華夷佇對捷書更開土宇臣叨  
深睿獎倍慊明誠塵浼宸嚴不任待責望恩迫切禱祈之  
至

謝恩賜興聖觀宏一大師張潛修造表

臣某伏覩恩勅宣賜左街興聖觀宏一大師張潛令修葺  
住持者寵自宸衷榮臻道域簪裳增忭芝朮騰輝臣某中



謝伏惟陛下道鈞軒后聖竝放勲凝懷於姑射之峯寄夢於華胥之境睠言大教理契生津棲神泯合於無爲屬念潛期於有德化合清靜善利家邦觀宇蕭條像設塵翳爰敷綸渥載俾葺崇伏以前建觀地接玉清昔爲道學尋改貞元之宇復標紫極之宮至德年中易名興聖前臨廣陌東距錦江宛是靈墟實惟勝所況門庭具設像貌儼存誠歷代之仙蹤乃皇都之福地今則重加繕飾盡撤葦腥拂塵埃於湫隘之中還瞻玉相蕩瓴甃於蒿榛之內別築瑤壇灑雨露而騫樹增榮薦沈麝而睟容伊穆張潛等精專

剗劖恪勵住持夕磬晨鐘祝遐長於聖壽朝香暮燭期隆  
永於皇圖臣某獲列教門躬榮睿澤不任之至

謝恩宣賜衙殿點鐘表

臣某伏蒙聖旨宣賜衙殿前點鐘一口於日院內充齋醮  
扣擊者恩垂霄漢榮及簪裳扑踏無階輝華增極伏惟陛  
下二儀覆燾三景照臨澤浸無涯惠敷有截故得八溟息  
浪長鯨將殄於昌時五緯循常巨彗欲銷於永夕削平夷  
夏倒戢干戈而復俯軫皇情留慈元教致感應於洞府符  
應見於靈仙固當齊聖壽於日月星辰隆寶祚於乾坤海

嶽今者念臣院宇之內簏簏未全每於齋醮之辰尚闕春容之響旣乏通眞之器莫諧集聖之儀輟瑤階泛日之音來從天上頒豐嶺含霜之韻降在人間事超錫樂之榮恩重點鐘之賜永當炷焚芝朮禱祝眞靈冀啟禎休仰酬聖獎所宣賜鐘臣敬以焚香祇受訖不任

謝恩賜玉局化老君表

臣某言伏奉恩勅宣賜舊玉局洞門石像老君歸龍興觀御容院閣下西間奉安供養其蓋石舍一區移拆就觀起立并賜錢設齋道衆將幡花引歸觀表讚等者皇澤霽臨

元門增耀康莊改觀道俗同歡臣某中謝伏惟陛下法道  
披元垂衣運化暢清靜無爲之理敷希夷不宰之功已洽  
大寧將臻一統以元元像貌密邇宸居雖香燈無曠於常  
儀而供養合歸於法宇爰申明命豐備齋羞焚蘭朮以飄  
香森幢幡而成列饒金鳴玉纔離象闕之庭雲邁風行遽  
入龍興之閣羣心瞻仰萬象歡隨雷喧讚悅之音霧集聖  
明之福臣與道眾等獲棲大教疊荷隆恩永勵修持上酬  
睿獎不任之至

賀收隴州表

臣某伏覩北面軍前隴州節度使桑簡以手下兵士及城池歸降收復隴州者睿算遐宣元勲效節纔申薄伐已復雄城臣某中賀伏惟陛下聖邁黃軒威超周武運神機於掌內動有成功料勅敵於穀中舉無遺策自岐郊負義關外隳盟深辜敦好之儀遽絕睦鄰之分擁豺狼之一旅恃疆土於三州巢折輦以偷生坐積薪而稱固小不事大春秋所誅所以義士盱衡謀臣扼腕皆期殄掃遂舉戈矛六軍奮躍以爭先八校喑鳴而致勇蹴土佇摧於吳岳飲馬將竭於渭流桑簡以智合變通心明向背倒戈銜璧効命

投誠獻千里之山河不施寸刃復一方之戶口無損秋毫  
便迴毫社之鋒自收商受之衆想回中之路絕退且無歸  
顧灞上之讎深竄將奚適料其元醜卽見梟擒廣通於八  
水三山永統於九州四海俱頒舜厯盡入禹封臣獲奉昌  
期冀觀大捷無任之至

壽春節進章真人像表

臣某伏以皇圖昭永上帝開祥北極瑤樞煥虹光而誕睿  
中天玉斗飛紫電以凝華萬國歡瞻羣心增抃伏惟陛下  
二儀炳靈九清集瑞至化塞乎天地清明肅於鬼神肇三

十世之宏基方隆周業興四百年之景運佇越漢圖浸德  
澤於元儒鼓薰風於夷夏今屬壽春大節祝聖昌辰琛賁  
雲馳梯航波委咸修芹禮以繼山呼臣與當院道士等虔  
拂華壇精依祕格諷琅書寶軸披霧韞霜羅克嚴蠲潔之  
誠永廣乾坤之福鑒聖真人昔師道祖躬受靈篇傳真記  
於先天緘瓊文於福地豫明皇業洞達元樞嵩公之識神  
堯貞白之知梁武以之校美詎可同年是敢藻績繅式  
資瞻仰庶因焚炷克嗣禎休干冒宸嚴臣無任祝聖虔切  
屏營之至其畫像功德數等謹詣閤門奉進以聞伏聽勅

旨

黃萬祐鄧百經賜紫衣師號謝恩表

臣某伏覩恩勅夔州道士黃萬祐賜紫衣仍師號羅江縣  
道士鄧百經賜紫衣者大聖御天神功及物庭有賢良之  
佐野無遺逸之人率土朝宗允當聖日臣某中謝伏以黃  
萬祐等林泉得志麋鹿爲羣深處巖蘿罔窺名利或丹華  
救物有迴生駐景之能朱篆誅邪有蕩魅除兇之效皆彰  
道用潛贊明時遽捧鶴書來朝鳳闕萬祐旣趨於錦水百  
經至自於羅江共仰堯天俱榮舜澤歷觀前史莫得比倫



伏惟陛下道邁唐堯功高軒后想汾水凝神之日尚遠九重比峒山請益之辰猶勞載駕今則蒲車允至桂檝云來徑捨煙蘿躬朝旒宸顯封嘉號俱錫服章美輝簡編光揚簪褐不任之至

詔與黃萬祐相見謝表

臣某言伏奉宣旨令臣就內樞密院與宏道大師黃萬祐相見者天慈軫念俯及孱微荷載難勝兢榮增極臣某中謝伏惟陛下化宏有道理尚至仁憂勞普及於萬方軫念無遺於一物故得眠雲逸士遙馳向闕之心傲世高人盡

識朝天之禮宏道大師夙探至術深隱嵌巖名姓可聞儀  
形莫覩今者爰隨徵詔直詣闕廷捨草帶荷裳寵紫衣師  
號事光史筆榮耀道門伏蒙聖慈宣命微臣與之相見獲  
奉睿明之獎得瞻雲鶴之容步武壺天躋身蓬島祇膺異  
渥榮耀萬生顧惟鷦鷯之微何報乾坤之德臣某不任

皇帝爲太子生日設齋表

右臣伏奉聖旨爲皇太子生辰特宣賜莊宅庫錢陸拾貫  
文省除於北帝院差選道衆二十一人於七月八日開置  
黃籙道場七晝夜至十五日散齋者伏以紫氣充庭青宮

誕睿動歡聲於六合凝喜氣於九重凡在寰區皆虔祝賀  
伏惟陛下恩周中外念軫臣僚以皇太子素切修行常思  
儉約懼無名之破費使眾力之煩勞一應諸司欲有齋修  
竝令止約頒賜內庫錢物特開仙觀壇場祈玉京金闕之  
真廣宸殿離方之福美高典冊事邁古先臣某獲奉絲綸  
將申焚祝覩維新之寵澤垂正大之宏規不任抃蹈之至  
謹錄狀陳賀謹奏